

## Stoirmeacha na bliana

### Ceist 1

Beidh tú ag féachaint ar ball ar thuairisc faoi na stoirmeacha a bhí againn sa tír seo le cúpla mí anuas. An bhfuil na focail seo, a bheidh le cloisteáil sa mhír, ar eolas agat? Pléigh leis an duine in aice leat iad.

- cumhacht
- córas ainmnithe
- aibhléis
- siotaí gaoithe
- d'eisigh
- códú foláireamh aimsire
- díol míosa
- athrú aeráide
- ag teacht le
- tuartha

An bhfuil focal eile agat atá comhchiallach leis an bhfocal **aibhléis**?

### Ceist 2

Gan féachaint ar an mír go fóill, déan féin agus an duine in aice leat cur síos ar na stoirmeacha a bhuail an tír ó mhí na Samhna.

### Ceist 3

**A.** Anois, féach ar an mír den chéad uair agus breac síos an oiread eolais agus is féidir leat faoi na stoirmeacha a luadh inti.

Abigail	
Barney	
Clodagh	
Desmond	
Eva	
Frank	
Gertrude	
Henry	

**B.** Cad a bhí le rá ag Micheál Ó Cinnéide faoi na stoirmeacha?

### Ceist 4

Súil siar ar na míonna.

'de mhí na Samhna'

Scríobh amach na míonna ar fad, mar atá sa sampla thuas. Tá an chéad cheann déanta duit.

de mhí Eanáir

_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____
_____	_____	_____

**Ceist 5**

Seo cuid de na huimhreacha ar fad a luadh sa mhír. Scríobh amach i bhfocail iad.

700 custaiméir  
an 8ú stoirm  
3 (mí)  
12/11 [dáta/mí]  
45,000 duine  
30ú  
6,000 duine  
29ú

**Ceist 6**

Pléigh na ceistanna seo leis an duine in aice leat:

1. Ar chuir na stoirmeacha ar fad isteach ar do shaol pearsanta féin?
2. Déan cur síos ar an damáiste ar fad a rinneadh fud fad na tíre de bharr na stoirmeacha.
3. An bhfuil baint ag na stoirmeacha le hathrú aeráide, dar leat? Cén fáth?

## Treoracha agus Freagraí

### Ceist 1

cumhacht – *power*  
córas ainmnithe – *naming system*  
aibhléis – *electricity*  
siotáí gaoithe – *gusts of wind*  
d'eisigh – *released*  
códú foláireamh aimsire – *weather alert coding*  
díol míosa – *a month's amount*  
athrú aeráide – *climate change*  
ag teacht le – *consistent with, agrees with*  
tuartha – *predicted*

*\*leictreachas*

### Ceist 2

Plé atá i gceist leis an gceist seo.

### Ceist 3

Tabhair deis do gach beirt plé a dhéanamh ar an méid a d'éirigh leo a thabhairt leo tar éis na chéad éisteachta.

### Ceist 4

de mhí Eanáir  
de mhí Feabhra  
de mhí an Mhárta  
de mhí Aibreáin  
de mhí na Bealtaine  
de mhí an Mheithimh  
de mhí Iúil  
de mhí Lúnasa  
de mhí Mheán Fómhair  
de mhí Dheireadh Fómhair  
de mhí na Samhna  
de mhí na Nollag

### Ceist 5

700 custaiméir – seacht gcéad custaiméir  
an 8ú stoirm – an t-ochtú stoirm  
3 (mí) – trí mhí  
12/11 – an dara lá déag de mhí na Samhna  
45,000 duine – ceathracha a cúig míle duine **nó** daichead a cúig míle duine  
30ú – an tríochadú lá  
6,000 duine – sé mhíle duine  
29ú – an naoú lá fichead **nó** an naoú lá is fiche

### Ceist 6

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

### Eimear Ní Chonaola

Tá seacht gcéad custaiméir gan chumhacht san iarthuaisceart inniu mar gheall ar stoirm Henry. Seo í an t-ochtú stoirm sa tír ó mhí na Samhna. Caitheann Sinéad Ní Neachtain anois súil siar ar na stoirmeacha<sup>1</sup> atá caite le trí mhí anuas.

### Sinéad Ní Neachtain

Go dtí seo, tá an tír seo buailte ag ocht stoirm ó tháinig stoirm Abigail i dtír ar an dara lá déag de mhí na Samhna. Ba í an chéad stoirm a bhuail an tír ó cuireadh tús leis an gcóras ainmnithe de chuid Met Éireann agus Oifig Met Shasana. Cúig lá ina dhiaidh sin, tháinig Barney, stoirm a d'fhág ceathracha a cúig míle duine gan cumhacht aibhléise. An tríochadú<sup>2</sup> lá den mhí chéanna, tháinig Clodagh agus thug sí siotaí gaoithe suas go céad ciliméadar san uair. Ach ba í stoirm Desmond, a bhuail ar an tríú lá de mhí na Nollag, a rinne an damáiste is mó. D'eisigh Met Éireann stádas dearg, an chéad uair riamh a rinneadh a leithéid ó cuireadh tús le códú foláireamh aimsire. Thit díol míosa de bháisteach i dtríocha a sé uair<sup>3</sup>. Bhí na mílte tigh<sup>4</sup> faoi uisce. Oíche Nollag a tháinig Eva; fágadh sé mhíle duine gan cumhacht aibhléise. Ansin ar an naoú lá fichead de Nollaig, bhuail stoirm Frank an tír. Dúnadh bóithre agus cuireadh seoltaí ar ceal. Bhí faoiseamh beag ann go dtí deireadh mhí Eanáir nuair a tháinig Gertrude i dtír le gálaí a chuir bac ar eitiltí as Baile Átha Cliath, Corcaigh agus Ciarraí.

### Sinéad Ní Neachtain

Agus inniu, tá Henry tagtha i tír anseo i nGaillimh le siotaí gaoithe suas ar chéad tríocha ciliméadar san uair in áiteachaí<sup>5</sup>. Ardaíonn líon na stoirmeacha seo ceisteanna maidir le hathrú aeráide agus an bhfuil aon cheangal eatarthu?

### Micheál Ó Cinnéide, Ollamh Emeritus le Tíreolaíocht, OÉ Gaillimh

Ní féidir bheith cinnte riamh gur athrú aeráide atá i gceist. Ach, is cinnte...rud amháin is féidir linn a rá go cinnte ná go bhfuil an stoirmiúlacht bhreise seo agus na gaoithe láidre, na tonnta móra, an bháisteach throm ag teacht go díreach leis an méid atá tuartha ag na saineolaithe le blianta beaga anuas.

### Sinéad Ní Neachtain

Is í Imogen an chéad cheann eile ar an liosta agus an-chuid eile ar ndóigh amach romhainn.

Sinéad Ní Neachtain, Nuacht TG4.

---

<sup>1</sup> *stoirmeacha* an leagan caighdeánach

<sup>2</sup> *an tríochú* a deirtear

<sup>3</sup> *i sé huair is tríocha* an leagan caighdeánach

<sup>4</sup> *teach* an leagan caighdeánach

<sup>5</sup> *áiteanna* an leagan caighdeánach